

16/09/1998

Rakyat wajar sokong tindakan PM

Nurhawani Zamin

SUKA saya menarik perhatian rakyat Malaysia agar berdiri teguh di belakang kepemimpinan Perdana Menteri Malaysia, Datuk Seri Dr Mahathir Mohamad dan meletakkan kepercayaan atas segala tindakan beliau.

Saya percaya, Dr Mahathir selaku pemimpin Malaysia yang matang, berani dan berwawasan tahu lagi arif dengan apa yang dilakukannya.

Apa yang menyedih dan memilukan sehingga mendorong saya menyuarakan pendapat ini ialah tindak balas orang ramai berikutan isu pemecatan Datuk Seri Anwar Ibrahim, baru-baru ini.

Walaupun di dada akhbar sentiasa melaporkan sokongan padu pelbagai pihak terhadap tindakan Dr Mahathir, apa yang dapat saya lihat dan dengar pula adalah sebaliknya.

Kononnya ramai menentang tindakan Dr Mahathir dan melahirkan rasa tidak puas hati serta simpati mendalam terhadap Anwar.

Melalui pengamatan dan pemerhatian saya, terbit banyak risalah yang berpihak kepada Anwar serta kaset yang memperdengarkan sokongan terhadap beliau.

Saya berkesempatan mendengar sebahagian isi kaset itu yang mendakwa Anwar difitnah.

Saya memang tidak berminat mendengar atau membaca atau terbabit dengan propaganda memperjuangkan Anwar dan setiap yang berkaitan dengannya.

Namun, ramai rakyat apatah lagi bangsa Melayu, saya lihat begitu ghairah dan taksub terhadap sumber seperti itu yang kesahihannya amat diragui. Ibarat isu mayat berkepala khinzir yang menggemparkan baru-baru ini sedangkan hakikatnya ia palsu sama sekali.

Oleh demikian, penting untuk kita bertindak sebagai rakyat Malaysia yang berfikiran matang dan rasional.

Kita tidak perlu membebankan fikiran dan bertikam lidah menyatakan siapa yang benar dan siapa yang salah.

Tidak perlu kita mendengar daripada mana-mana sumber yang boleh diragui.

Siapa kita untuk bertindak sedemikian? Kalau ada antara kita menegakkan yang Anwar difitnah, mampukah kita membuktikannya?

Jika sekadar omong kosong dan cakap belakang, lebih baik kita berdiam diri dan serahkan semuanya kepada pihak berkuasa.

Saya sedih apabila melihatkan bangsa Melayu kini berpuak-puak kesan daripada isu itu.

Pahatkanlah kelima-lima rukun negara dalam ingatan kita. Percayalah kepada Tuhan. Setialah kepada Raja dan Malaysia. Yakinlah kepada perlembagaan negara. Hormat dan patuhilah kepada undang-undang dan jadilah rakyat Malaysia yang bertatasusila dan berakhlak mulia.

Apakah kita sudah lupa dengan tema Hari Kebangsaan tahun lalu: Akhlak Mulia, Masyarakat Jaya?

Marilah kita menyatakan kesediaan untuk bersama pemimpin nombor satu negara.

Lahirkanlah rasa terima kasih kita dengan cara menghormati dan mentaati beliau.

Insyallah, detik hitam ini kembali memutih sedikit masa apatah lagi dengan sokongan rakyat.